

Bybel vir Kinders
bied aan

Jesus en
Saggeus



Geskryf deur: Edward Hughes

Ge-illustreer: Janie Forest

Aangepas deur: Ruth Klassen
Alastair Paterson

Vertaal deur: Gert Badenhorst

Vervaardig deur: Bible for Children
www.M1914.org

©2020 Bible for Children, Inc.

Lisensie: U het die reg om hierdie stories te kopieër en te druk maar u mag dit nie verkoop nie.





Eendag het
Jesus deur
Jerigo gegaan.
Dis die stad
wat lank tevore
deur Josua-
hulle verwoes
is. Dit was
nou herbou en
baie mense het
daar gewoon.
Tussen hulle
was daar 'n man
met die naam
Saggeus.







Waarskynlik het die ander mense nie van Saggeus gehou nie, omdat hy belasting van hulle ingevorder het. Saggeus het 'n deel van die geld vir die regering gestuur, maar 'n groot deel vir homself gehou.




As belastingbeampte het Saggeus baie ryk geword.
Sy huis kon maklik die GROOTSTE en MOOIESTE in
die buurt gewees het.



Maar hy was ook baie kort - nie kort aan geld nie, maar kort in lengte. Saggeus het nooit so lank soos ander mense geword nie.





Toe Saggeus hoor dat Jesus in Jerigo is, wou die klein belastingbeampte die Man van Nasaret, wat beweer het Hy is die Seun van God, graag sien. Maar die skares was groot ... en die mense lank.





Saggeus het 'n idee gekry!
As hy vóór die skare kon
kom ... in 'n boom kon klim
wat oor die straat hang ...
kon hy Jesus dalk sien.





Saggeus het in 'n
wildevyeboom geklim,
in 'n gemaklike mik gaan
sit en vir Jesus gewag.
"Ek sal van hier af
goed kan sien," het hy
moontlik gedink. "Ek
sal Hom kan sien,
sonder dat Hy
my sien."



“Saggeus, kom gou af.” Die klein belastingbeampte kon sy ore nie glo nie. Jesus het onder die boom gestaan. Jesus het na hom gekyk. Jesus het hom geroep!






As Saggeus verras was om Jesus na hom te hoor roep, moes hy verstom gewees het toe Jesus sê: "Ek moet vandag in jou huis tuisgaan." Saggeus het so vinnig afgeklim, hy't amper geval.



Saggeus was in die wolke omdat Jesus sy huis wou besoek. Maar die ander mense het nie daarvan gehou nie. Hulle het beswaar gemaak omdat Jesus 'n sondaar soos Saggeus wou besoek.






Jesus het 'n totaal nuwe lewe vir Saggeus gebring. Saggeus het gesê: "Here, ek gaan die helfte van my goed vir die armes gee, en waar ek iets van iemand afgepers het, gee ek dit vierdubbel terug."



Jesus was bly oor
Saggeus se nuwe
lewe. Hy hou
daarvan as mense
wegdraai van sonde
af en doen wat reg
is. Jesus het gesê:
"Die Seun van die
mens het gekom om
te soek en te red
wat verlore is."
Daardie dag in
Jerigo het Jesus
Saggeus gevind!



Jesus en Saggeus

'n Storie uit God se woord, die Bybel,

soos gevind in

Lukas 19

"Die lees van die Woord gee lig."

Psalms 119:130



Die Einde



Dié Bybelstorie vertel ons van ons wonderlike God
wat ons gemaak het en wat wil hê dat ons Hom sal leer ken.

God weet ons doen baie verkeerde dinge, Hy noem dit sonde. Die straf vir sonde is die dood, maar God het ons só lief dat Hy sy Seun, Jesus, gestuur het om vir ons sondes aan die kruis te kom sterf. Jesus het opgestaan uit die dood en opgevaar hemel toe! Wanneer jy in Jesus glo en Hom vra om al jou sondes te vergewe, sal Hy dit doen! Hy sal saam met jou stap deur die lewe, en jy sal vir altyd saam met Hom lewe!

As jy glo dat dit die waarheid is, sê dan die volgende vir God: Liewe Jesus, ek glo dat U God is en vir al my sondes kom sterf het en nou vir altyd lewe. Kom stap asseblief saam met my deur my lewe. Vergewe asseblief al my sondes, sodat ek 'n nuwe lewe kan hê en eendag vir altyd saam met U kan lewe. Help my om aan U gehoorsaam te wees en vir U te lewe, sodat ek u kind genoem kan word. Amen.

Lees die Bybel en praat elke dag met God! Johannes 3:16

